
ՇՈՒՇԻՆ ԱՐՅԱԽՅԱՆ ԳՈՅԱՊԱՅՔԱՐՈՒՄ
(1918–1920 թթ.)

ՀԱՄԼԵՏ ՀԱՐՈՒԹՅՈՒՆՅԱՆ

«Հայոց արևելից կողմանց»՝ Արցախի աշխարհի ազատագրական պայքարի բազմադարյան պատմության մեջ դեպքերի և դրամատիկ իրադարձությունների ընդգրկումով, որոնք խոր հետք են թողել արցախահայության պատմական ճակատագրի վրա, առանձնանում են, թերևս, 1918–1920 թվականները: Հենց այդ տարիներին էր, որ Լեոնային Ղարաբաղը դարձավ «վիճելի տարածք»: Ադրբեջանի նորաթուխ մուսավաթական կառավարությունը նպատակադրվել էր բռնագավթել պատմական Հայաստանի տարածքներից Լեոնային Ղարաբաղը, Ջանգեզուրը և Նախիջևանը: Նրա ծավալապաշտական ծրագրերը բացահայտ քաջալերում և դրանց իրականացմանը նպաստում էին Թուրքիան, որոշ ժամանակ անց՝ դաշնակից տերությունները, գլխավորապես՝ Անգլիան, իսկ Ադրբեջանի խորհրդայնացումից հետո՝ նաև բոլշևիկյան Ռուսաստանը:

Այնուհանդերձ, իրենց փառավոր նախնիների ազատատենչ ոգին ու արիությունը չկորցրած Արցախի հայությունը ծառս եղավ ռիսկալ թշնամու դեմ և կենսացմահու պայքար մղեց իր բնօրրան երկրի ազատության ու անկախության համար: Այդ պայքարի հենակետը դարձյալ Շուշի բերդաքաղաքն էր, որը, իրավամբ, արցախցիների համար կազմակերպական, բարոյական և քաղաքական հենարանի ռազմավարական նշանակություն ուներ:

Փետրվարյան հեղափոխությունից հետո Արցախի աշխարհն ապրում էր լիարյուն ինքնուրույն կյանքով: Ինչպես ամենուրեք, այնպես էլ Լեոնային Ղարաբաղում ստեղծվում էին տեղական իշխանության գործադիր մարմիններ: 1917 թ. մարտի 11-ին Շուշի քաղաքի Ղազանչեցոց եկեղեցում հրավիրվեց նախապատրաստական ժողով, որը քննարկեց գավառի գործադիր մարմին ընտրելու հարցը: Հաջորդ օրը՝ մարտի 12-ին, գաղտնի քվեարկությամբ տեղի ունեցավ Լեոնային Ղարաբաղի գործադիր մարմնի ընտրությունը, որին մասնակցեցին բնակչության բոլոր խավերի ներկայացուցիչները: Ընտրվեց 40 հոգուց բաղկացած գործադիր կոմիտե՝ Լեոնային Ղարաբաղի ներքին կյանքը ղեկավարելու համար¹: Նշենք նաև, որ Փետրվարյան հեղափոխությունից հետո Շուշի քաղաքում ստեղծվեց բանվորական ներկայացուցիչների խորհուրդ, որին հետագայում միացան զինվորական և գյուղացիական համանուն խորհուրդները, որոնք գտնվում էին սոցիալ-դեմոկրատների ազդեցության տակ²:

¹ Տե՛ս «Մշակ» (Թիֆլիս), 30. III. 1917:

² Տե՛ս «Նեցուկ» (Շուշի), 13. IX. 1917:

Հոկտեմբերյան հեղաշրջումը կասեցրեց նախկին կայսրության ժողովուրդների համար փետրվարով սկսված ազատության հաղթարշավը և ազգային պետական նոր միավորումների ստեղծման գործընթացը: Այս ընդհանուր վիճակն ամբողջապես հատկանշական էր նաև Անդրկովկասին: 1917 թ. նոյեմբեր–դեկտեմբեր ամիսներին Լեռնային Ղարաբաղում իշխանություն գրեթե չկար: Գավառը հեծում էր անիշխանության ճիրաններում: Գոյություն ունեցող միակ տեղական մարմինը՝ 72 անդամներից բաղկացած գործադիր կոմիտեն, լիովին անգործության էր մատնված³:

Համաարցախյան իշխանության բացակայության հետևանքով շարունակաբար խորանում էր գավառի տնտեսական ճգնաժամը և մեծանում սոցիալական լարվածությունը: Ստեղծված պայմաններում, բնականաբար, առաջանում է իրադրության վերազնահատման և նոր գործելակերպ մշակելու պահանջ:

1917 թ. նոյեմբերին Շուշի քաղաքում հավաքվեցին մի շարք կուսակցությունների ու քաղաքական կազմակերպությունների ներկայացուցիչներ և քննության առան Լեռնային Ղարաբաղը ստեղծված կացությունից դուրս բերելու հարցը⁴: Հավաքի մասնակիցները Արցախի քաղաքական հոսանքների ներկայացուցիչներից ընտրեցին տեղական իշխանության ժամանակավոր մարմին՝ «Հայ հեղափոխական կուսակցությունների ու կազմակերպությունների Ղարաբաղի ժամանակավոր խորհուրդ» (հետագայում կոչվեց «Միջկուսակցական բյուրո» կարճ անունով): Խորհրդի կազմում ընտրվեց 14 հոգի՝ հինգ դաշնակցական, երեք մենջևիկ, երեք բոլշևիկ, երեք էսէ: Հարկ է նշել, որ հետագայում բոլշևիկները, ինչ-որ սկզբունքային պատճառաբանություններ հրապարակ բերելով, հեռացան խորհրդի կազմից⁵: Տեղին է նշել, որ խորհրդի գործունեությունը սահմանափակվում էր Շուշի քաղաքի շրջանակներում: Ինչ վերաբերում է Լեռնային Ղարաբաղի չորս՝ Դիզակ, Խաչեն, Վարանդա և Ջրաբերդ գավառներին, ապա դրանք մնացել էին առանց իշխանության:

Ազգային կոմիտե ստեղծեց նաև Շուշի քաղաքի թուրք ազգաբնակչությունը⁶:

Դեպքերի անսպասելի ընթացքը (Շուշի–Եվլախ մայրուղու փակվելը, անիշխանության խորանալը և այլն) պետք է, որ սթափեցնեին հայ ազգային շահերով մտահոգվողներին: Այդ հարցերը քննարկվեցին «Միջկուսակցական բյուրոյում» և մուսուլմանների Ազգային կոմիտեում: Կայացվեց համանման որոշում. լուծարել Ղարաբաղի գործադիր կոմիտեն և փոխարենը ստեղծել ավելի ձկուն ու աշխատունակ նոր մարմին: 1917 թ. դեկտեմբերի 20-ին Շուշիում հրավիրվեց Ղարաբաղի գործադիր կոմիտեի արտահերթ նիստ: Մուսուլմանների Ազգային կոմիտեի ներկայացուցիչների և «Միջկուսակցական բյուրոյի» անդամների պահանջով գործադիր կոմիտեն հրաժարական տվեց: Կողմերի փոխադարձ համաձայնությամբ ստեղծվեց նոր մարմին, որը հայտնի է «Միջազգային» կամ «Ազգամիջյան կոմիտե» անունով: Այն

³ Տե՛ս նախատանի ազգային արխիվ (այսուհետև՝ ՀԱԱ), ֆ. 222, ց. 1, գ. 30, թ. 21:

⁴ Տե՛ս ՀԱԱ, ֆ. 314, ց. 1, գ. 111, թ. 27–28:

⁵ Տե՛ս նույն տեղում, գ. 34, թ. 48–49:

⁶ Տե՛ս ՀԱԱ, ֆ. 199, ց. 1, գ. 38, թ. 11:

կազմված էր 13 հոգուց (վեց հայ, վեց մուսուլման և մեկ չեզոք անձ՝ որպես դեկավար)⁷։ Իշխանության մարմիններ ստեղծվեցին նաև տեղերում. նշանակվեցին քաղաքացիական, դատական և զինվորական լիազորներ։

Շուշիում գործող «Միջկուսակցական բյուրոյից», թուրքերի Ազգային կոմիտեից և ոչ մեկը չդարձավ ընդհանուր ճանաչում և հեղինակություն վայելող իսկական կենտրոնական իշխանություն։ Անդրադառնալով այդ օրերին Լեոնային Ղարաբաղում տեղի ունեցող քաղաքական անցուդարձին՝ «Կավկասկոյե սլովո» թերթը գրում էր. «Անդրկովկասի կոմիսարիատը պետք է լրջորեն մտածի քաղաքում և գավառում տեղական իշխանություն ստեղծելու մասին, առանց որի անկարելի է կյանքը նորմալ հունի մեջ դնել»⁸։ Իսկապես որ, կյանքը դուրս էր եկել սովորական հունից։ Եվլախ-Շուշի մայրուղուց բացի փակվեց նաև Գորիս-Ավդալլար (Լաչին)- Շուշի ճանապարհը⁹։ Պարենային և ֆինանսական ճգնաժամն ընդունեց սուր բնույթ։ Սովն ու համաճարակը մոլեգնում էին հայկական գյուղերում և խլում հազարավոր կյանքեր¹⁰։

Լեոնային Ղարաբաղի ընդհանուր վիճակն էլ ավելի թուլացրեց տեղական իշխանությունների դիրքերը և նրանց կանգնեցրեց կազմալուծման փաստի առջև։ 1918 թ. հուլիսի 16-ին ինքնալուծարման ենթարկվեց «Միջկուսակցական բյուրոն»։ Նրա փոխարեն ստեղծվեց նոր մարմին, որը կոչվեց «Ղարաբաղի հայ ժողովրդական ժամանակավոր կառավարություն» կամ «Կոմիսարների խորհուրդ»։ Ղարաբաղը բաժանվեց երկու (Վարանդա-Դիզակ և Խաչեն-Ջրաբերդ) վարչական շրջանի և յուրաքանչյուրի համար նշանակվեց լիազոր¹¹։

1918 թ. հուլիսի 22-28-ը Շուշիի թեմական դպրոցի դահլիճում գումարվեց արցախահայության առաջին համագումարը։ Լեոնային Ղարաբաղի բոլոր շրջաններից համագումար էին եկել 180 պատգամավորներ։ Խորհրդակցական ձայնով մասնակցում էին նաև Շուշի քաղաքում գործող հասարակական հոսանքների ու կազմակերպությունների ներկայացուցիչներ։ Համագումարն Արցախը հայտարարեց վարչաքաղաքական անկախ միավոր, ընտրեց Ազգային խորհուրդ և կազմեց նոր կառավարություն՝ կոալիցիոն սկզբունքով։ Այն ստացավ «Ղարաբաղի ժողովրդական կառավարություն» անունը¹²։ Կառավարության իրավասությունը տարածվում էր ամբողջ գավառի վրա։ Նորընտիր ժողովրդական կառավարությունը եռանդուն կերպով լծվեց տեղերում իշխանության մարմինների ստեղծման գործին։ Քաղաքի և մերձակա շրջանների անվտանգությունն ապահովելու համար հուլիսի 27-ին հաստատվեց պարետություն։ Գավառի ներքին խնդիրները լուծելու համար կառավարության հուլիսի 29-ի որոշմամբ ստեղծվեց չորս հանձնաժողով՝ ֆինանսական,

⁷ Տե՛ս շՄՄ, ֆ. 221, ց. 1, գ. 30, թ. 24։

⁸ «Кавказское слово» (Тифлис), 15. IV. 1918.

⁹ Տե՛ս շՄՄ, ֆ. 221, ց. 1, գ. 30, թ. 24։

¹⁰ Տե՛ս նույն տեղում։

¹¹ Տե՛ս նույն տեղում, թ. 27-28։

¹² Տե՛ս շՄՄ, ֆ. 314, ց. 1, գ. 34, թ. 49։

պարենավորման, բժշկա-սանիտարական և վարչաիրավական: Գյուղական լիազորների փոխարեն նշանակվեցին զավառային և քաղաքային կոմիսարներ: Ջրաբերդ-Գյուլիստանում, Խաչենում, Դիզակում և Շուշիում հիմնվեցին հաշտարար դատարաններ: Իբրև բարձրագույն վճռաբեկ ստյան՝ Շուշիում ստեղծվեց շրջանային դատարան և նրան կից հասուկ գործերի քննիչ հանձնաժողով¹³:

Օգոստոսի 3-ին կառավարությունը բաց թողեց մի քանի շրջաբերականներ՝ սպեկուլյացիայի, փողի արժեզրկման, նպաստների, հայ-թաթարական հարաբերությունների մասին:

Շուշի քաղաքում գործում էին նաև հետևյալ հասարակական մարմինները՝ քաղաքային ինքնավարությունը, զինվորական միությունը, ոստիկանությունը և աղքատախնամ հոգաբարձությունը: Հարկ է ասել, որ նշված բոլոր մարմինները, բացառությամբ քաղաքային ինքնավարության, որը մեռած մարմնի տպավորություն էր թողնում, զուտ հայկական էին և գործում էին քաղաքի հայկական թաղամասում¹⁴:

Այսպիսով, «Ղարաբաղի ժողովրդական կառավարության» ստեղծումով ավարտվեց Ղարաբաղի հայկական անկախ իշխանության կազմավորման դժվարին գործընթացը: «Ղարաբաղի ժողովրդական կառավարության ստեղծումով հայերը հռչակեցին նրա անկախ գոյության իրավունքը, որը, հարկավ, սկսեց տհաճություն պատճառել թուրքերին», – գրել է «Մշակ» թերթը¹⁵:

Ազգամիջյան խորացող ասեղությունը վաղ թե ուշ զավառին կանգնեցնելու էր ներքին կոռիվների ողբերգական փաստի առաջ, որից հետո այն մարելը գրեթե անհնարին կլիներ: Այդ բանի գիտակցումով էլ Ղարաբաղի իշխանությունները կտրականապես դեմ էին վիճելի հարցերը ուժային մեթոդներով լուծելուն և ամեն ինչ անում էին, որպեսզի նման հարցերը հանգուցալուծվեին քաղաքակիրթ ձևով՝ բանակցությունների միջոցով: Սակայն Ադրբեջանի ղեկավարությունը Լեռնային Ղարաբաղը նվաճելուց հրաժարվելու մտադրություն չունեց և սպասում էր հարմար պահի՝ իր ծրագրերն իրականացնելու համար: Պահը չուշացավ. Գանձակ էին շտապում Օսմանյան թուրքերը:

1918 թ. մայիսյան հերոսամարտերում հայ ժողովրդի անձնուրաց պայքարը ձախողեց Հայաստանի արևելյան հատվածը նվաճելու և նրա հայ բնակչությանը բնաջնջելու երիտթուրքական ծրագիրը: Սակայն հակառակորդը դեռ մեծ փտանգ էր ներկայացնում Հայաստանի ու ողջ երկրամասի համար: Բնավ էլ պատահական չէ, որ Հայաստանի օդը դեռ չէր մաքրվել մայիսյան կոռիվների վառողի ծխից, երբ թուրքական զորքերը Ղազախ-Ադստաֆա գծով շարժվեցին դեպի Բաքու՝ նպատակ ունենալով, մի կողմից, կանխել գերմանացիներին¹⁶, մյուս կողմից՝ գրավել Բաքուն և

¹³ Տե՛ս նույն տեղում, թ. 60:

¹⁴ Տե՛ս «Հորիզոն» (Թիֆլիս), 17. IX. 1918:

¹⁵ Տե՛ս «Մշակ», 23. II. 1919:

¹⁶ 1918 թ. ամռանը գերմանական հրամանատարության հիմնական խնդիրներից մեկը համարվեց Բաքվի գրավումը (տե՛ս Ե. Л ю д е н д о р ф. Мои воспоминания о войне 1914–1918 гг., т. 2. М., 1924, с. 219–220):

նախադրյալներ ստեղծել համաթուրքական նպատակների իրականացման համար:

Դեպի Բաքու շարժվող թուրքական բանակից առանձնացավ մի զորախումբ և Կովկասյան 2-րդ դիվիզիայի հրամանատարներից Ջեմիլ Ջահիդ¹⁷ բեյի գլխավորությամբ գնաց դեպի Ղարաբաղ ու բանակատեղի դարձրեց Ադրամը՝ Լեռնային Ղարաբաղի սահմանային դարպասներից մեկը, որը բանակի էր գավառ ներխուժելու համար: Թուրք զորահրամանատարը, վստահ իր ուժերի վրա, ծրագրել էր սրբնջաց գրոհով վերցնել Շուշին՝ Արցախի աշխարհի սիրտը և նրա հավերժության խորհրդանիշը: Մինչ այդ Նուրի փաշան Գանձակի հայերից ու թաթարներից բաղկացած մի պատվիրակություն ուղարկեց Շուշի՝ նրա բնակչությանը համոզելու ընդունել Ադրբեջանի հպատակությունը: Շուշեցիները «անհյուրասեր» գտնվեցին պատվիրակության անդամների նկատմամբ: Շուշի մտնելու հենց առաջին օրը բանագնացներին՝ կասկածելով հայրենիքի դավաճանության մեջ, շուշեցիները բանտարկեցին: Շուշիի մտավորականության ջանքերի շնորհիվ հաջողվեց հնգօրյա բանտարկությունից հետո նրանց ազատ արձակել: Դեպի Գանձակ հետդարձի ճանապարհը բռնած պատվիրակությանը շուշեցիները հրահանգեցին, որ իրենք վճռականորեն դեմ են Ադրբեջանի իշխանությանը¹⁸: Նուրի փաշան համոզվեց, որ Լեռնային Ղարաբաղի հայությունը համառորեն հրաժարվում է Ադրբեջանին ենթարկվելուց և ջանում է միանալ Հայաստանի Հանրապետությանը: Նա որոշեց բռնությամբ տիրանալ Արցախին: Ղարաբաղի վրա թուրքերի հարձակմանը նախորդեց Ղարաղջլաղ (ներկայիս Բերձոր) հայկական մեծ գյուղի կործանումը, որը ծանր հարված էր Ղարաբաղին: Գյուղը պատկանում էր Ջանգեզուրի գավառին և սահմանակից էր Շուշի քաղաքին: Ղարաբաղի համար այն ուներ ռազմավարական նշանակություն. Գորիսից դեպի Շուշի միակ ճանապարհը անցնում էր Ղարաղջլաղով:

Սեպտեմբերի 6-ին՝ Ղարաղջլաղի անկումից երկու օր անց, Շուշիում հրավիրվեց Լեռնային Ղարաբաղի հայության երկրորդ համագումարը: Նրա աշխատանքներին մասնակցում էր 200 մարդ, այդ թվում՝ ներկայացուցիչներ քաղաքական բոլոր կուսակցություններից: Այն պետք է քննարկեր գավառի ներքին ու արտաքին կյանքին վերաբերող մի շարք հարցեր¹⁹: Ջահիդ բեյի անունից երկու վերջնագիր է ստացվում՝ մեկն ուղղված Ղարաբաղի հայոց հոգևոր առաջնորդին, մյուսը՝ գավառի հայ ազգաբնակչությանը²⁰: Վերջնագիրը բովանդակում էր՝ երեք օրվա ընթացքում բոլոր զենքերը հանձնել տաճկական հրամանատարությանը և անձնատուր լինել²¹:

¹⁷ Մի շարք փաստաթղթերում հանդիպում ենք նաև Ջամիլ Ջավիդ ձևով (տե՛ս շՄԱ, ֆ. 314, ց. 1, գ. 34, թ. 66):

¹⁸ Տե՛ս Նагорный Карабах в 1918–1923 гг. Сборник документов и материалов. Отв. ред. В. А. Микаелян. Ереван, 1992, с. 20.

¹⁹ Տե՛ս «Նոր հորիզոն» (Թիֆլիս), 18. IX. 1918:

²⁰ Տե՛ս շՄԱ, ֆ. 221, ց. 1, գ. 24, մաս 3, թ. 46, ֆ. 199, ց. 1, գ. 38, թ. 11:

²¹ Տե՛ս «Մշակ», 22. II. 1919:

Համագումարը, մեկ անգամ ևս արտահայտելով արցախահայության կամքը, անառարկելիորեն մերժում է թուրք բարձրաստիճան զինվորականի պահանջը և միաձայն արտահայտվում Հայաստանի Հանրապետության հետ միավորվելու օգտին: Այնուհանդերձ, հնարավոր առճակատումից խուսափելու համար համագումարը կազմեց պատվիրակություն, որը պետք է մեկներ Ադդամ և երես առ երես բանակցեր թուրքական հրամանատարության հետ²²:

Երկրորդ համագումարը սեպտեմբերի 11-ի նիստում «Ղարաբաղի ժողովրդական կառավարությունը» վերանվանեց «Ղարաբաղի հայոց ժողովրդական խորհուրդ»: Այն պիտի իրագործեր համագումարի ընդունած շատ կարևոր մի որոշում՝ ընտրեր Ադդամ մեկնող պատվիրակության անդամներին: Երկու օր շարունակ խորհուրդը և քաղաքում գտնվող պատգամավորները զբաղված էին պատվիրակների ընտրությամբ: Ոչ ոք չէր ցանկանում մտնել պատվիրակության կազմ, ամեն ոք վախենում էր, թե իրեն ժողովուրդը պիտի նայի որպես դավաճանի: Ի վերջո, կազմվեց պատվիրակություն, որը սեպտեմբերի 15-ին մեկնեց Ադդամ ու ներկայացավ Ջահիդ բեյին: Վերջինս, որ արդեն տեղյակ էր համագումարի որոշումներին, առանց պատվիրակների խոսքը լսելու նրանց ներկայացրեց նոր պահանջներ. 1. հպատակվել Ադդամի կառավարությանը, 2. զինաթափ լինել, 3. ճանապարհ տալ թուրքական և ադրբեջանական զորքերին անցնելու Շուշի²³: Ջահիդ բեյը պատվիրակության անդամներից երկուսին՝ Հ. Մուսայեյանին ու Դ. Առաքելյանին, թույլատրեց վերադառնալ Շուշի այն պայմանով, որ տեղում իրենց խնդիրը կատարելուց հետո վերադառնան Ադդամ և իրազեկ դարձնեն Ղարաբաղի հայ ազգաբնակչության մտադրության մասին, իսկ մյուսներին բանտարկեց²⁴: Սեպտեմբերի 16-ին պատվիրակության անդամները հասան Շուշի: Նոր համագումար հրավիրելու անհրաժեշտություն առաջացավ: 1918 թ. սեպտեմբերի 17–22-ին Շուշիում գումարվեց Ղարաբաղի հայության երրորդ համագումարը: Պատգամավորների ընդհանուր թիվը հասնում էր շուրջ 200-ի²⁵: Համագումարի աշխատանքներն ընթանում էին բուռն վեճերի պայմաններում: Երեք օրվա քննարկումներից հետո (էլույթ ունեցավ 78 պատգամավոր) միակամ որոշվեց՝ արյունահեղությունից խուսափելու համար առանց կովի գնալ համաձայնությամբ²⁶: Մինչ համագումարը զբաղված էր Ջեմիլ Ջահիդ բեյի վերջնագրի պատասխանը հստակեցնելով՝ սեպտեմբերի 19-ին Ադդամ ժամանեց Կովկասում գործող թուրքական բանակի գլխավոր հրամանատար Նուրի փաշան: Նույն օրը նա ազատ արձակեց բանտարկված պատվիրակներին և ուղարկեց Շուշի: Նուրին վերջնագիր ուղարկեց Շուշիի հայությանը՝ պահանջելով զինաթափվել ու ճանաչել Ադդամի իշխանությունը: Թուրք փաշան պատասխանի համար տալիս է 24 ժամ²⁷:

²² Տե՛ս «Մշակ», 22. X. 1918:

²³ Տե՛ս «Մշակ», 27. II. 1919:

²⁴ Տե՛ս «Մշակ», 22. II. 1919:

²⁵ Տե՛ս նույն տեղում:

²⁶ Տե՛ս շՄԱ, ֆ. 200, ց. 1, գ. 243, թ. 94, ֆ. 276, ց. 1, գ. 16, թ. 14–15:

²⁷ Տե՛ս շՄԱ, ֆ. 314, ց. 1, գ. 34, թ. 69:

Հայ պատվիրակները մեծ դժվարությամբ հասան Շուշի: Երրորդ համագումարը սեպտեմբերի 20-ի նիստում Նուրի փաշայի վերջնագիրը քննարկելուց հետո որոշեց թուրքերի հետ բանակցելու համար նոր պատվիրակություն ուղարկել Ադդամ²⁸: Պատգամավորությանը չհաջողվեց նշված ժամկետում լինել Ադդամում, որովհետև գավառից եկած գյուղացիների մի մեծ խումբ, դժգոհ լինելով համագումարի որոշումից (արցախահայության գերակշիռ մեծամասնությունը դեմ էր թուրքերի հետ ամեն տեսակի զիջողության), թույլ չի տալիս նրանց մեկնելու: Ի վերջո, սեպտեմբերի 21-ին բանագնացների խումբը դուրս է գալիս Շուշիից: Խմբի հետ Ասկերան է ուղևորվում նաև քաղաքից ընտրված մեկ այլ պատվիրակություն՝ անդամակցությամբ Արցախի թեմի առաջնորդ Վահան եպիսկոպոսի և Բյուզանդ վարդապետի, ովքեր պետք է Ասկերանի շրջանի գյուղացիներին հորդորեին խաղաղությամբ ընդունել թուրքերին և չդիմադրել նրանց Ասկերանով անցնելիս: Ասկերանում երկու պատվիրակության անդամներն էլ, մեղադրվելով հայրենիքի դավաճանության մեջ, բնակչության կողմից ձերբակալվում են: Թեմի առաջնորդից վերցնելով մեքենան՝ նրան ոտքով ուղարկում են Շուշի, իսկ մյուսներին բանտարկում Ասկերանի մոտ գտնվող Խանաբադ (Ոսկեվազ) գյուղում²⁹: Որոշ մանրամասներ պարզելուց հետո՝ սեպտեմբերի 21-ին, նրանց ազատ են արձակում:

Թուրքական բանակի հրամանատարությունն արդեն սկսել էր զինաթափել հայերին: Այսպես, 1918 թ. սեպտեմբերի 20-ին Ջահիդ բեյը Խաչենի 20-ից ավելի հայկական գյուղերից պահանջեց ճանաչել Ադրբեջանի իշխանությունը և զինաթափ լինել: Արյունահեղությունից խուսափելու համար բնակչությունը հանձն է առնում զինաթափվել՝ պայմանով, որ թուրք ասկյարները չմտնեն գյուղերը և բռնություն չգործարեն խաղաղ բնակչության նկատմամբ: Շատ շուտով ոտիսը բացահայտեց իր դեմքը, պարզ դարձավ, որ այդ հույսերն ապարդյուն են: Սեպտեմբերի 22-ին թուրքական զորքը մտավ Լեռնային Ղարաբադ: Բանակի հրամանատարությունը և գավառապետ Խոսրով բեկ Ֆալատովը ծեծի ու սպանությունների սարսափի տակ ժողովրդից խլեցին բոլոր զենքերը և տեղափոխեցին Ադդամ³⁰: Թուրք-թաթարական զինված կազմավորումները սեպտեմբերի 22-23-ին լայնածավալ հարձակում սկսեցին Ղարաբադի վրա Քարազուլիսից մինչ Միրուշեն³¹: Սկսվեց Ղարաբադի արյունաներկ պատմությունը:

Թշնամին մեկը մյուսի հետևից գրավեց Ասկերանի աջ ու ձախ կողմերի Միրջանլու, Դահրազ, Վարազաբուն (Արանգամին), Փրջամալ, Նախիջևանիկ, Քյաթուկ, Խրամորթ, Խանաբադ (Ոսկեվազ), Քարազուլիս գյուղերը³²: Թուրքական զորքերը Ջահիդ բեյի գլխավորությամբ շարժվում են դեպի Շուշի՝ ճանապարհին ավերելով ամեն ինչ: Ղարաբադի ինքնապաշտպանական ուժերը գերադասեցին նրանց զինված դիմադրություն ցույց չտալ, որովհետև այդ դեպքում քաղաքում հայերի և թուրքերի միջև

²⁸ Տե՛ս «Նոր հորիզոն», 19. X. 1918:

²⁹ Տե՛ս նույն տեղում:

³⁰ Տե՛ս Հ. Հ ա թ ու թ յ ու ն յ ա ն. Լեռնային Ղարաբադը 1918-1921 թթ., Երևան, 1996, էջ 60:

³¹ Տե՛ս նույն տեղում:

³² Տե՛ս ՀԱԱ, ֆ. 222, ց. 1, գ. 24, մաս 3, թ. 418:

կոտորածն անխուսափելի կդառնար: Շուշին առանց կովի անձնատուր եղավ: Տաճիկ ասկյարները, որոնց թիվը հասնում էր շուրջ 2000-ի³³, Շուշի մտան սեպտեմբերի 24-ին: Նրանք տեղավորվեցին քաղաքի դպրոցական շենքերում, գորանոցներում ու թուրքական թաղամասում: Ասկյարներն ունեին ութ թնդանոթ և մի քանի տասնյակ գնդացի: Ձորքի հետ քաղաք էր ժամանել նաև մուսավաթական կառավարության պաշտոնական լիազոր Իսմայիլ խան Ձիաթխանովը՝ հրահանգ ունենալով համոզել բնակչությանն ընդունելու Ադրբեջանի իշխանությունը³⁴: Թուրքերը, գրավելով Շուշին, այնտեղ մտցրին ռազմական դրություն: Շուշիի պարետ նշանակվեց Նազմ բեյը, իսկ ընդհանուր նահանգապետ՝ Իսմայիլ խան Ձիաթխանովը: Թուրքական տիրապետության հետևանքով Ադրբեջանի իշխանությունը տարածվեց Շուշի քաղաքի և Քարինտակ, Շոշ ու Ղայբալու գյուղերի վրա³⁵: Ճիշտ է՝ Շուշին ընկել էր, բայց կանգուն էին մյուս շրջանները՝ Ձիվանշիրը, Ջրաբերդը, Դիզակը և Վարանդան: Հասկանալի է, որ դեռևս թուրքական հարձակման նախօրյակին այդ շրջանների զինված ուժերը ինքնաբերաբար համախմբվեցին գավառի աչքի ընկնող գործիչների շուրջը և չենթարկվեցին թուրքական հրամանատարությանն ու Ադրբեջանի կառավարությանը: Այսքանից հետո թուրքերը մոլորություն չունեին կարծելու, թե Շուշի մտնելը բավական է, որ իրենցը համարեն ողջ Լեռնային Ղարաբաղը: Ադրբեջանի թելադրանքով թուրք հրամանատարությունը ցրեց Ղարաբաղի կառավարությունը և զինաթափ արեց հայ բնակչությանը: Խուժելով քաղաք՝ տաճիկ ասկյարները, քրդերն ու տեղական թուրքերը սկսեցին կողոպտել հայերի տները, խանութները և կոտորել նրանց: Սարսափելի կոտորածն ու թալանը տևեցին երկու օր ու դադարեցին երրորդ օրը միայն՝ պարետ Նազմ բեյի հրամանով³⁶: Թուրք-թաթարական ռազմամուլներն առաջին հերթին հաշվեհարդար տեսան Շուշիի հայ մտավորականության հետ: 1918 թ. հոկտեմբերի 1-ի գիշերը տաճիկ ասկյարները խուժեցին նրանց տները: Միայն այդ գիշեր ձերբակալվեցին մի քանի տասնյակ մտավորականներ՝ ավելի քան 60 հոգի³⁷:

Շուշի քաղաքը ապրում էր խիստ ռեժիմի պայմաններում: Երեկոյան ժամը 7-ից հետո արգելվում էր փողոց դուրս գալ. ում տեսնում՝ ձերբակալում էին: Նույնիսկ քաղաքից դուրս կամ գյուղից քաղաք գնալու համար պահանջվում էր անցաթուղթ³⁸:

Բնակչության գլխին կախված բոլոր տեսակի դժվարություններից ամենից սարսափելին սովն էր: Թուրքերի մուտք գործելուց հետո գյուղացիները բոյկոտ հայտարարեցին քաղաքին և թույլ չտվեցին, որ որևէ մեկը կենսամթերք բերեր քաղաք, դա էլ այն դեպքում, երբ քաղաքը կտրված էր

³³ Տե՛ս «Նոր հորիզոն», 19. X. 1918: Որոշ աղբյուրներում այդ թիվը հասնում է 4000-ի (տե՛ս «Մշակ», 27. II. 1919) և 5000-ի (տե՛ս ՀԱՄ, ֆ. 276, ց. 1, գ. 16, թ. 16):

³⁴ Տե՛ս «Նոր հորիզոն», 19. X. 1918:

³⁵ Տե՛ս «Արձագանք» (Թիֆլիս), 15. VIII. 1919:

³⁶ Տե՛ս «Նոր հորիզոն», 27. IX. 1918:

³⁷ Տե՛ս «Նոր հորիզոն», 19. X. 1918, «Արև» (Բաքու), 4. III. 1919:

³⁸ Տե՛ս ՀԱՄ, ֆ. 323, ց. 1, գ. 1, թ. 44–46:

դրսի աշխարհից, հաղորդակցություն չունենալը թե՛ Գանձակի և թե՛ Գորիսի հետ³⁹:

Այն օրերին, երբ թուրքերը շարժվում էին դեպի Շուշի, Ջիվանշիրի գավառի հատվածներում անհավասար կռվում ջարդեց ու դուրս շարտեց իր հողը ներխուժած թուրքերին: Ջիվանշիրում կրած ջախջախիչ պարտությունից հետո տաճկական բանակի հրամանատարությունը վճռում է գրավել Վարանդան: Թուրքական զինուժը առանց դիմադրության հանդիպելու մտավ Շոշ, այնուհետև՝ Տոնավարգ և Խաչմաչ գյուղերը: Հոկտեմբերի 17-ի երեկոյան թշնամին հասավ Վարանդայի Մամնա գյուղը և գիշերեց այնտեղ: Ջենքի ընդունակ բնակչությունը ոտքի կանգնեց: Ամենուր կազմակերպվեցին աշխարհագրային ջոկատներ: Նույն օրը հայկական մի ջոկատ՝ Ասլան Մուրադխանյանի (Ասլանիկ) գլխավորությամբ, ամրանում է Մաշադիշեն գյուղի մոտ ընկած բարձունքներում՝ փակելով դեպի Ամարասի ձոր տանող միակ ճանապարհը: Հայ զինյալները փակեցին նաև դեպի Շուշի տանող նահանջի ուղիները: Գիշերվա խրախճանքը դեռ չվայելած՝ թուրք սակյարները և թաթար զինվորները հոկտեմբերի 18-ի լուսաբացը դիմավորեցին շրջապատման մեջ ընկած⁴⁰: Շրջապատումից դուրս գալու թշնամու բոլոր ջանքերը ապարդյուն անցան. կռիվը տևեց մի ամբողջ օր: Հակառակորդը մարտադաշտում թողեց մի քանի տասնյակ զինվոր, նաև 3 թնդանոթ, 4 գնդացի և ռազմամթերքով բեռնավորված 30 ջորի: Ոստիսի կենդանի մնացած աննշան թվով զինվորները, օգտվելով մառախլապատ եղանակից, ծածուկ քաշվում են դիմացի անտառը, իսկ այնտեղից գիշերով մեծ դժվարությամբ հասնում Շուշի⁴¹:

Այսպիսով, Շուշին ընկավ, սակայն Արցախի գավառները թշնամու համար մնացին անմատչելի: Վարանդայի, Դիզակի, Խաչենի և Ջրաբերդի գորահրամանատարներն այդ շրջաններում ամբողջ իշխանությունը կենտրոնացրին իրենց ձեռքը և պաշտպանեցին երկիրը վերահաս վտանգից միջև անգլիական ներկայացուցչության գալը:

1918 թ. հոկտեմբերի 30-ի Մուղրոսի զինադադարով Թուրքիան զորքերը հետ քաշեց Անդրկովկասից, մաքրեց նաև Ղարաբաղը: Անդրկովկասում թուրք-գերմանական նվաճողներին փոխարինեցին անգլիացի «խաղաղարարները»:

Շուշիից թուրքական զորքերի հեռանալուց հետո՝ 1918 թ. նոյեմբերի սկզբին, քաղաք մտավ անգլիական մի ռազմական ներկայացուցչությունը՝ մայրը Գիպոնի գլխավորությամբ: Քաղաքի հայությունը մեծ ոգևորությամբ դիմավորեց «ազատարարներին»⁴²: Մայրն իր հրամանատարության անունից տեղեկացրեց, որ այս ներկայացուցչությունն ուղարկված է գեներալ Թոմսոնի կողմից, ով դաշնակից զորքերի հրամանատարն է Բաքվում, ապահովելու է օրենքն ու կարգը Շուշիի շրջանում: Այս հայտարարեց, որ քաղաքական ու տարածքային խնդիրները

³⁹ Տե՛ս շՄԱ, ֆ. 222, ց. 1, գ. 24, մաս 3, թ. 418:

⁴⁰ Տե՛ս շՄԱ, ֆ. 314, ց. 1, գ. 34, թ. 65:

⁴¹ Տե՛ս «Արև», 21. II. 1919:

⁴² Տե՛ս շՄԱ, ֆ. 200, ց. 1, գ. 309, թ. 204:

ներկայացուցչությանը չեն վերաբերում և պիտի լուծվեն Փարիզի խաղաղարար կոնֆերանսում⁴³:

Մուսավաթական Ադրբեջանը անգլիական ռազմական ներկայացուցչության գիտությամբ ու ակտիվ մասնակցությամբ ձգտում էր անել այն, ինչը նրան չհաջողվեց թուրքերի օգնությամբ: Բրիտանական ռազմական ներկայացուցչության Ղարաբաղ մուտք գործելուց հետո տեղի քաղաքական ուժերի մեջ ուրվագծվում է երկու ուղղություն: Շուշիի քաղաքագլուխ Գերասիմ Մելիք-Շահնազարյանի և Ղարաբաղի գործերի ընդհանուր հրամանատար Սոկրատ բեկ Մելիք-Շահնազարյանի գլխավորած հոսանքը բռնել էր անգլիացիներին հլու-հնազանդ ենթարկվելու ուղին: Նրանք գտնում էին, որ պետք է ենթարկվել դաշնակիցների կամքին, անտեղի արյուն չթափել, համբերատար սպասել վեհաժողովի արդար վճռին: Հակառակ դեպքում դա կարող է վնասել Արցախի դատին: Իսկ դաշնակցության Ապառաժի (Ղարաբաղ) կոմիտեն և Ղարաբաղի ժամանակավոր Հայոց Ազգային խորհուրդն անիմաստ էին համարում անգլիացիներին հետ հույսեր կապելը, առավել ևս նրանցից օգնություն և աջակցություն սպասելը: Նրանք Արցախի հարցի լուծումը իրավացիորեն կապում էին ազատագրական պայքարի հետ և ճիգ էին գործադրում զենքի ենթակա բնակչությունից զինյալ խմբեր ստեղծելու ուղղությամբ:

Այդ ընթացքում Ադրբեջանը մեծ թվով զորամասեր էր ուղարկում Լեռնային Ղարաբաղ և նրանց տեղավորում գավառի ռազմավարական նշանակություն ունեցող կետերում: Օրինակ՝ Խանքենդ ավան մտցրին «Վայրի դիվիզիայի» մի զորամաս, թվով 1500 զինվոր՝ թնդանոթներով ու գնդացիներով զինված: Մինչ այդ Ադրբեջանը գործ էր մտցրել Ասկերան: Ադրբեջանական զինուժ կենտրոնացվեց նաև Շուշիում: Այստեղ գտնվող զինվորների թիվը հասցվեց 1000-ի⁴⁴: Արցախի ռազմական ուժերի դիմադրությունը ճնշելու և գավառը վերջնականապես գրավելու նպատակով՝ Ադրբեջանի մարտական ուժերը թուրք սպաների հրամանատարությամբ հարձակումներ են սկսում տարբեր ուղղություններով: Նրանք ավերածությունների ենթարկեցին Ասկերանի շրջանը: Այդ օրերին Արցախում կատարվող իրադարձությունների վերաբերյալ արխիվային տարբեր փաստաթղթերում տեղ գտած վկայություններում նշվում է, որ թուրք-թաթարական կանոնավոր զորքերը սահմուկեցուցիչ վայրագություններ կատարեցին նաև Դիզակի և Վարանդայի գյուղերում⁴⁵: Եվ այդ ամենը կատարվում էր անգլիական ներկայացուցչության աչքի առաջ, իսկ վերջինս կույր ու խուլ գտնվեց կատարվածի հանդեպ: Ավելին, երբ Ղարաբաղի Հայոց Ազգային խորհուրդը հայ ազգաբնակչության նկատմամբ գործադրվող սպանդի կապակցությամբ բողոքեց անգլիացիներին, նրանք անամոթաբար պատասխանեցին, որ իրենք քաղաքական խնդիրներով չեն զբաղվում, իրենց նպատակն է օգնել գաղթականությանը և

⁴³ Տե՛ս «Մշակ», 2. III. 1919:

⁴⁴ Տե՛ս ՀԱՍ, ֆ. 370, ց. 1, գ. 40, թ. 11–12:

⁴⁵ Տե՛ս ՀԱՍ, ֆ. 223, ց. 1, գ. 74, թ. 52:

գրադվել Ղարաբաղի տնտեսական հարցերով⁴⁶: Դրությունը շարունակում էր բարդանալ:

1919 թ. հունվարի 15-ին Ադրբեջանի կառավարությունը հայատյաց Խոսրով բեկ Սուլթանովին նշանակեց Շուշիի, Ջանգեզուրի, Ջեբրայիլի, Ջիվանշիրի, այսինքն՝ Ելիզավետպոլի նահանգի հարավարևելյան հայկական գավառների գեներալ-նահանգապետ⁴⁷: Այդ նշանակումը կատարվեց արցախահայության կամքին հակառակ: Փետրվարի 28-ին Շուշիի անգլիական ներկայացուցչությունը, հանձին Սոնկ Միզոնի, երբ դիմում է Ղարաբաղի Հայոց Ազգային խորհրդին և պահանջում ճանաչել Խոսրով բեկ Սուլթանովի գեներալ-նահանգապետությունը, ստանում է հստակ պատասխան. «Հայկական Ղարաբաղը չի կարող հաշտվել նման փաստի հետ, որովհետև կախումը Ադրբեջանի կառավարությունից, ինչպիսի ձևով էլ այն արտահայտվելու լինի, Ղարաբաղի հայությունը համարում է անընդունելի»⁴⁸: Նույն բովանդակությամբ նամակ-հանձնարարական է ուղղվում նաև հայկական զորամասերի հրամանատարներին: Վերջիններս պատասխանում են, որ իրենք լիովին պաշտպանում են Ազգային խորհրդի տեսակետը⁴⁹:

Նորաթուխ նահանգապետը ժամանեց Շուշի փետրվարի 10-ին և բնակության վայր ընտրեց քաղաքի թաթարական թաղամասը: Փետրվարի 20-ին բրիտանական ներկայացուցչությունը կազմեց մի նախագիծ, որով սահմանեց Սուլթանովի լիազորությունները: Ըստ այդմ՝ գեներալ-նահանգապետին կից ստեղծվում էր խորհուրդ՝ կազմված երեք հայերից, նույնքան էլ մուսուլմաններից և անգլիական ներկայացուցչության անդամներից: Նահանգապետի քաղաքացիական մասի օգնականը լինելու էր հայ⁵⁰:

Երկրամասի ժամանակավոր կառավարման նախագիծը հակառակ սկզբունքներով էր կազմել Ղարաբաղի Հայոց Ազգային խորհուրդը: Այդ նախագծի համաձայն՝ մինչև խաղաղության կոնֆերանսի որոշումը, հայկական Ղարաբաղը ղեկավարվելու էր հետևյալ կերպ. ա) կառավարումը կենտրոնանում է մարզային խորհրդի ձեռքում՝ կազմված 7 հոգուց, նստավայր ունենալով Շուշին: բ) Հատուկ համաձայնությամբ խորհրդի կազմում մտնում են մեկական ներկայացուցիչ Հայաստանի և Ադրբեջանի հանրապետություններից: գ) Բրիտանական ներկայացուցչությունը խորհրդի աշխատանքի նկատմամբ վերահսկողության իրավունք ունի: Նա կարող է փոխել կամ կարճել խորհրդի ցանկացած որոշում: դ) Պաշտոնատար բոլոր անձինք նշանակվում են խորհրդի կողմից: ե) Կողմերի զորամասերի տեղափոխությունները կատարվում են ներկայացուցչության գիտությամբ և համաձայնությամբ: Գլխավոր ռազմավարական կետերում տեղաբաշխվում են բրիտանական զորամասերն ու ուղեկալները⁵¹:

⁴⁶ Տե՛ս «Հառաջ» (Երևան), 29. I. 1919:

⁴⁷ Տե՛ս ՀԱԱ, ֆ. 200, ց. 1, գ. 244, թ. 1:

⁴⁸ Տե՛ս «Մշակ», 16. III. 1919, 19. III. 1919, ՀԱԱ, ֆ. 200, ց. 1, գ. 243, թ. 28-30:

⁴⁹ Տե՛ս ՀԱԱ, ֆ. 4033, ց. 5, գ. 429, թ. 2-4:

⁵⁰ Տե՛ս ՀԱԱ, ֆ. 252, ց. 1, գ. 5, թ. 1-2, «Մշակ», 19. III. 1919:

⁵¹ Տե՛ս «Մշակ», 22. III. 1919, «Ժողովուրդ» (Երևան), 6. IV. 1919:

Անգլիական ներկայացուցչության և նրա ղեկավար Թոմսոնի կողմից հայկական նախագիծը չընդունվեց:

Լեոնային Ղարաբաղում և Զանգեզուրում ադրբեջանական գեներալ-նահանգապետի նշանակումը զայրացրեց Հայաստանի Հանրապետությանը: 1919 թ. հունվարի 21-ին Հայաստանի կառավարությունը պաշտոնապես Ադրբեջանի կառավարությանը հայտարարեց, որ ինքը չի կարող ընդունել, նույնիսկ ժամանակավոր, Ադրբեջանի իշխանությունը Ղարաբաղի վրա, որը կազմում է Հայաստանի անբաժան մասը⁵²: Խոսքով բեկ Սուլթանովը, որի իշխանությունը գործնականում տարածվում էր միայն Շուշի քաղաքի թուրքական թաղամասի և Խանքենդ ավանի վրա, զանազան միջոցների էր դիմում, որպեսզի տեղական իշխանության մարմինները և պետական նախկին հիմնարկությունները կենտրոնացնի իր ձեռքում: Իր դիվային ծրագրերի իրականացման խնդրում նա փորձում էր ստանալ Ղարաբաղի նշանավոր մարդկանց ու քաղաքական գործիչների աջակցությունը: Այդ նպատակով Սուլթանովը զրույցի հրավիրեց Շուշիի քաղաքագլուխ Գերասիմ Մելիք-Շահնազարյանին, եպիսկոպոս Վահանին, Ե. Բշխանյանին և Գ. Մինասրեկյանին: Ժողովրդի պահանջով այդ հանդիպումը հետաձգվեց: Սուլթանովը հրավեր ուղարկեց նաև քաղաքի հայկական թաղամասի կառավարիչներին և ժողովրդական ու քաղաքային դպրոցների ուսուցիչներին՝ նպաստ ստանալու, պայմանով, որ նրանք նախապես ստորագրությամբ հաստատեն, որ ճանաչում են Ադրբեջանի իշխանությունը: Սուլթանովի այս քայլը ևս ձախողվեց: Հայ բնակչությունը անկախությունը վեր դասեց նպաստ ստանալուց՝ ասելով, որ «Մեր խիղճը դրամով չենք կարող ծախել»⁵³: Այս ամենից հետո Սուլթանովի կարգադրությամբ փակվեց քաղաքի հայկական թաղամասում գտնվող գանձատունը և արգելվեց ամեն կարգի վճարում կատարելը: Միաժամանակ նա բոլոր պաշտոնյաներին հայտարարեց, որ նրանք գանձարանից ոռճիկ կստանան այն դեպքում, երբ կտան ստորագրություն, որ 1919 թ. հունիսի 1-ից առ այսօր ծառայում են Ադրբեջանի կառավարությանը և այսուհետ էլ պիտի ծառայեն⁵⁴:

Ադրբեջան-Անգլիա-Սուլթանով եռյակի ագրեսիվ քաղաքականությանը դիմագրավելու համար անհրաժեշտ էր մշակել պատասխան գործողությունների ծրագիր: Դա կարող էր անել միայն Ղարաբաղի հայության նոր համագումարը: 1919 թ. փետրվարի 10-ից 21-ը Շուշիում գումարվեց արցախահայության 4-րդ համագումարը, որին մասնակցում էր 50 պատգամավոր: Համագումարը քննարկեց Ադրբեջանին և նոր նշանակված գեներալ-նահանգապետին ցույց տրվելիք վերաբերմունքի հարցը: Արտահայտելով ժողովրդի միասնական կամքը՝ համագումարը որոշում է. «Չճանաչել Ադրբեջանի իշխանությունը հայկական Ղարաբաղի սահմաններում և բողոքել բրիտանական ներկայացուցչությանը, Բաքվի բրիտանական գործերի հրամանատար Թոմսոնին, Հայաստանի Հանրապետությանը, Ադրբեջանի

⁵² Տե՛ս «Ժողովուրդ», 26. III. 1919, «Աշխատավոր» (Թիֆլիս), 12. III. 1919:

⁵³ «Արև», 26. III. 1919:

⁵⁴ Տե՛ս «Հառաջ», 25. IV. 1919:

պառլամենտի նախագահին՝ Ադրբեջանի ոստնձգությունների դեմ»⁵⁵: Համագումարն ընտրեց Ազգային խորհուրդ և հանձնարարեց նրան ստեղծել զինվորական շտաբ, որը պետք է զբաղվեր երկրի պաշտպանության հարցերով⁵⁶:

Դեպքերը զարգանում և իրար էին հաջորդում չափազանց արագ: Թաթարական բանդաները փակել էին Շուշի տանող ճանապարհները: Սուլթանովը Ղարաբաղը հեշտությամբ նվաճելու հույս էր փայփայում: 1919 թ. փետրվարի 25-ին իր կառավարությանն ուղղված բացատրագրի մեջ վստահեցնում էր, որ ինքը քայլ առ քայլ, առանց ֆիզիկական ուժ գործադրելու կկարողանա ստիպել հայերին, որ նրանք ընդունեն Ադրբեջանի իշխանությունը⁵⁷:

Ինչ վերաբերում է Շուշիում անգլիական ներկայացուցչության գործունեությանը, ապա նա ենթադրում էր, որ եթե խիստ միջոցներ կիրառի Ղարաբաղի Ազգային խորհրդի ազդեցիկ անդամների նկատմամբ, հնարավոր կլինի Արցախը ենթարկել Ադրբեջանի իշխանությանը: Նա սկսեց բռնության ու հալածանքի քաղաքականությունը: Նախ, Շուշիից հեռացրեց հանրային գործիչներ Գ. Բալայանին և Լ. Զառաֆյանին, ովքեր նոր էին եկել Բաքվից, և բնական է, որ իրենց կարճատև գործունեության ընթացքում դժվար թե առիթ տված լինեին որևէ կերպ կասկածելու իրենց:

Դրան հաջորդեցին նոր խաղեր: Անգլիական հրամանատարությունը Բաքու հրավիրեց վեց հայ պատգամավորի: Ազգային խորհուրդն ընտրեց Բաքու մեկնող պատվիրակություն՝ Շուշիի քաղաքազուխ Գ. Մելիք-Շահնազարյանի ղեկավարությամբ⁵⁸: 1919 թ. մարտի 26-ին Բաքվում Ղարաբաղի պատվիրակները հանդիպում ունեցան գնդապետ Շատելվորդի հետ: Հարկ ենք համարում ընթերցողի ուշադրությանը հանձնել նրա հետ զրույցից մի հատված: Շատելվորդի այն հարցին, թե ինչի է ձգտում Ղարաբաղի հայությունը, պատվիրակության անդամներից Ասլան Շահնազարյանը պատասխանում է. «Դեպի մեծ Հայաստանը, որի հետ նրա լեզվական, մշակութային և տնտեսական կապերը ընդհանրական են»⁵⁹: Ադրբեջանի գերիշխանությունը ճանաչել տալու Շատելվորդի ջանքերն ապարդյուն անցան:

Ապրիլի 3-ին բրիտանական զինվորական ներկայացուցչության անունից Շատելվորդը դիմում է Ղարաբաղի հայ բնակչությանը՝ առանց դիմադրության ընդունելու Ադրբեջանի իշխանությունը⁶⁰: Հայաստանի կառավարությունը բողոքեց այդ հայտարարության դեմ և կատարեց գործնական քայլեր Հայաստան-Արցախ վարչական համապետական միասնության հաստատման ուղղությամբ: Ապրիլի 11-ի որոշմամբ ծնունդով շուշեցի, ՀՅԴ Բյուրոյի ներկայացուցիչ Միքայել Արզումանյանը նշանակվեց Շուշիում անգլիական ներկայացուցչությանը կից Հայաստանի

⁵⁵ Տե՛ս շՄԱ, ֆ. 252, ց. 1, գ. 1, թ. 18-19, ֆ. 200, ց. 1, գ. 193, մաս 1, թ. 223:

⁵⁶ Տե՛ս նույն տեղում:

⁵⁷ Տե՛ս շՄԱ, ֆ. 199, ց. 1, գ. 38, թ. 11-12:

⁵⁸ Տե՛ս շՄԱ, ֆ. 200, ց. 1, գ. 293, թ. 45-47:

⁵⁹ Տե՛ս նույն տեղում, գ. 5, թ. 10-11, ֆ. 252, ց. 1, գ. 5, թ. 4-5:

⁶⁰ Տե՛ս «Հատուց», 25. IV. 1919:

Հանրապետության ներկայացուցիչ⁶¹: Հաջորդ քայլը եղավ Շատելվորդի այցը Արցախ: Նա Ազգային խորհրդից վերջնագրի ձևով պահանջեց իր ներկայությամբ լուծել Ադրբեջանին հպատակվելու հարցը⁶²: Նրա մասնակցությամբ արցախահայության ներկայացուցիչները հրավիրում են 5-րդ համագումարը, որը սկսվեց ապրիլի 23-ին և տևեց մինչև ապրիլի 29-ը: Համագումարը լսեց Շատելվորդի «Ղարաբաղի ժամանակավոր իշխանության վարչական ծրագիրը» զեկուցումը, որում ջանում էր համագումարին խաբելով, համոզելով, սպառնալով, բարոյական ճնշում գործադրելով հասնել նրան, որ պատգամավորները Ղարաբաղը ճանաչեն Ադրբեջանի կազմում: Ապրիլի 24-ի նիստում տեղի ունեցավ զեկուցման ծավալուն քննարկումը: Երկար քննարկումից հետո համագումարը հանգեց միասնական եզրահանգման. «... անհնարին և անընդունելի է համարում Ադրբեջանի հետ առնչություն ունեցող որևէ ծրագիր և այդ ծրագրի բռնի իրականացումը կյանքի մեջ համարում է անխուսափելի պատճառ՝ ստեղծելու ազգամիջյան լուրջ խմորումներ»⁶³:

Ղարաբաղում վճռական գործողություններ ծավալելուց առաջ Սուլթանովը ցանկացավ արցախահայությանը խեղդել սովի միջոցով: Գեներալ-նահանգապետի կարգադրությամբ մայիսի 20-ից հայերի առջև փակվեցին Դաշտային Ղարաբաղի հետ կապող բոլոր ճանապարհները: Ամենուր ժողովուրդը հեծում էր սովի ճիրաններում: Բաքվում լույս տեսնող «Արև» թերթի հուլիսի 27-ի համարում կարդում ենք. «Վարանդան և Խաչենը կանգնած են սովի դռանը, իսկ մի շարք գյուղերում արդեն սով է»⁶⁴: Մարսավելի էր հայ գաղթականության՝ Գանձակում և զավառում ապաստանած 1915 թ. վերապրողների դրությունը: Ամենաստակալին երկրամասում տիրող անիշխանությունն էր: Անիշխանության և թողտվության հետևանքով Ղարաբաղում օր օրի ծաղկում էր ավագակությունը, թալանը և մարդասպանությունը: Սա դեռ բոլորը չէ: Ղարաբաղում իր սև «գործն» էր անում համաճարակը, որը խլում էր հազարավոր մարդկային կյանքեր⁶⁵:

Շարունակվող տնտեսական բոյկոտը դարաբաղցիներին ստիպեց դիմել համապատասխան քայլերի: Ազգային խորհրդից նրանք պահանջեցին քոչվորների (մայիսի 27-ին զինված բանդաների ուղեկցությամբ քոչվորները բռնեցին սար տանող ճանապարհը) ճանապարհը փակելու թույլտվություն: Սակայն Ազգային խորհուրդը, որը շարունակաբար ուղիներ էր որոնում երկու հարևան ժողովուրդների միջև խաղաղությունը վերականգնելու համար, դա անթույլատրելի համարեց⁶⁶:

Բոլորովին հակառակ գործելակերպ էր որդեգրել Սուլթանովը. հունիսի 2-ին առանց որևէ նախազուշացման գանձատունը և հեռագրատունը քաղաքի հայկական թաղամասից փոխադրեց ադրբեջանական թաղամաս: Հայության արյան ծարավ բժիշկը նույն օրը Շուշիի ադրբեջանական թաղամաս

⁶¹ Տե՛ս նաև ՀԱԱ, ֆ. 200, ց. 1, գ. 50, մաս 1, թ. 154:

⁶² Տե՛ս նաև «Հատառ», 24. IV. 1919:

⁶³ Տե՛ս նաև «Ժողովուրդ», 14. V. 1919, □Արև□, 30. IV. 1919, 18. V. 1919:

⁶⁴ «Արև», 27. VII. 1919:

⁶⁵ Տե՛ս նաև «Արև», 9. IV. 1919:

⁶⁶ Տե՛ս նաև ՀԱԱ, ֆ. 200, ց. 1, գ. 309, թ. 171–172:

մտցրեց քրդական մի բանդա, թվով 3 հազար մարդ, ինչպես նաև 1500 զինված ադրբեջանական զորախումբ: Հունիսի 2-ին և 3-ին Շուշիի հայկական թաղամասից բոլոր ադրբեջանցիները ծածուկ հեռացան ադրբեջանական թաղամաս: Հունիսի 3-ին թուրքական զորամասերը փակեցին Շուշիից դեպի Գորիս տանող խճուղին⁶⁷: Համալողմանի նախապատրաստությունից հետո՝ հունիսի 4-ին՝ առավոտյան ժամը 10-ին, Սուլթանովի հրամանով սկսվեց Շուշիի հայկական թաղամասի գնդակոծումը: Այդ օրը քաղաքի թուրքական թաղամաս աշխատանքի մեկնած 50 հայից վերադառնում է 7-ը, իսկ մնացածներին քրդերը գազանաբար հոշոտում են⁶⁸: Շուշիի հայկական թաղամասի գնդակոծումը տևեց շուրջ 16 ժամ: Ադրբեջանցի զինվորներն ու քրդական բանդան մտան քաղաքի հայկական թաղամաս և սոսկալի ավերածություններ կատարեցին⁶⁹: Այդ օրերին քաղաքի թուրքական մասում մորթվեց 40 հայ⁷⁰:

Սուլթանովի հրոսակախմբերն իրենց «բարձրության» վրա գտնվեցին նաև Ղայբալիշեն գյուղը կործանելիս: Այն գտնվում է Շուշիի հարևանությամբ: Գյուղի վրա հարձակումը սկսվեց հունիսի 5-ին՝ գիշերվա ժամը 10-ին: Գազազած հրոսակները, մտնելով գյուղ, սոսկալի ոճրագործություն կատարեցին. 70 տուն ունեցող գյուղը մեկ օրվա ընթացքում վերածվեց մոխրակույտի, հարյուրավոր մարդիկ սրի քաշվեցին, որոնց մեծ մասը երեխաներ էին, կանայք ու ծերեր: Ըստ Ղարաբաղի դեպքերը քննող պատմաբանական հանձնաժողովի արձանագրության՝ Ղայբալիշենի կործանման ժամանակ սպանվեց 500 մարդ: Եկեղեցին քարուքանդ է արվել: Տների ավերակներում կիսախանձ դիակներ են: Գետինը ծածկված էր երեխաների դիակներով: Ղայբալիշենի մոտ գտնվող մատուռում մորթվել էր 50 հայ⁷¹: Այլ աղբյուրների վկայությամբ՝ գյուղի 700 բնակիչներից փրկվել էին 100–180 մարդ⁷²: Ըստ ականատեսների՝ այն պահին, երբ թուրք-քրդական բանդան հոշոտում էր խաղաղ բնակչությանը, բրիտանական ներկայացուցչության անդամները Սուլթանովի տան պատուհանից հրճվանքով դիտում էին այդ «տեսարանը»⁷³:

Թուրք-քրդական զինված խմբերը արյունահեղություններ կազմակերպեցին նաև քաղաքամերձ Կրկժան, Փահլուր, Ջամիլու գյուղերում՝ կոտորելով հարյուրավոր մարդկանց:

Հունիսի 7-ին թշնամին հարձակվեց Քարինտակ ու Դադուշեն գյուղերի վրա և հանդիպելով բնակչության լուրջ դիմադրությանը՝ նահանջեց⁷⁴:

Անգլիական հրամանատարության կողմից Շուշի մեկնած գնդապետ Գլատերբերգը, ծանոթանալով կատարված արյունալի անցքերին, Շատելվորդին ներկայացրած զեկուցագրում համարձակություն ունեցավ խոստովանել

⁶⁷ ՀԱԱ, ֆ. 252, ց. 1, գ. 1, թ. 64:

⁶⁸ Տե՛ս «Ժողովուրդ», 22. VI. 1919:

⁶⁹ Տե՛ս ՀԱԱ, ֆ. 252, ց. 1, գ. 1, թ. 64:

⁷⁰ Տե՛ս «Պահակ» (Բոստոն), 14. VI. 1919:

⁷¹ Տե՛ս ՀԱԱ, ֆ. 4033, ց. 5, գ. 461, թ. 168–172:

⁷² Տե՛ս ՀԱԱ, ֆ. 199, ց. 1, գ. 23, թ. 387, գ. 76, թ. 12:

⁷³ Տե՛ս ՀԱԱ, ֆ. 314, ց. 1, գ. 34, թ. 92:

⁷⁴ Տե՛ս ՀԱԱ, ֆ. 57, ց. 2, գ. 557, թ. 26:

ճշմարտությունը. «... պիտի ընդունել, որ կոտորածը նախապես ծրագրված է եղել Սուլթանովի կողմից»⁷⁵: Վերջում նա պահանջում է կատարած հանցավոր քայլերի համար դատի տալ Սուլթանովին: Այդ կապակցությամբ Սուլթանովին գլխավոր հանցագործ է ճանաչում նաև տեղում հարցը ճշտելու նպատակով Շուշի մեկնած Ադրբեջանի պառլամենտականներից կազմված հանձնաժողովը: Պառլամենտին ներկայացված հանձնաժողովի եզրակացության մեջ պարզ ու որոշակի ասված է, որ Շուշիում ու գյուղերում կոտորածների նախաձեռնողն ու կազմակերպիչը եղել է Սուլթանովը: Խորհրդարանը, սակայն, գտավ, որ Ղարաբաղի «տեղական իշխանության և հատկապես ընդհանուր նահանգապետի գործողությունների մեջ չկա ապօրինության և ոչ մի փաստ»⁷⁶:

Ղարաբաղի դեպքերի առիթով Բաքվի Հայոց Ազգային խորհրդի նախագահության անդամները տեսակցություն ունեցան Ուսուրբեկովի հետ, որը 1919 թ. ապրիլի վերջերից գլխավորում էր Ադրբեջանի նոր մինիստրական կաբինետը: Այդ կապակցությամբ արտահայտելով իր տեսակետը՝ նա ցինիկորեն ասել է. «Որքան էլ ցավալի լինեն Ղարաբաղի վերջին անցքերը, իմացած եղեք, որ դրանք վերջինը չեն լինելու, քանի դեռ Ղարաբաղի հայկական գավառները կշարունակեն իրենց դիմադրությունը Ադրբեջանի դեմ»⁷⁷:

Հունիսյան եղեռնագործությունը չընկճեց Ղարաբաղի հայ ազգաբնակչությանը: Ավելին, այդ իրադարձությունները արցախահայությանը մեկընդմիջտ համոզեցին, որ պետք չէ հավատալ անգլիացիներին ու դաշնակից մյուս պետություններին և նրանց հետ հույսեր կապել: Նա լիովին հասկացավ, որ իր հայրենիքի ու իր օջախի պաշտպանը միայն ինքն է ու իր թիկունքին կանգնած մայր Հայաստանը: Դրա խոսուն ապացույցը հունիսյան դեպքերին անմիջապես հաջորդող օրերին Ղարաբաղի գավառներում տեղի ունեցող գյուղացիական 5-րդ և 6-րդ համագումարներն էին և դրանց ընդունած որոշումները՝ երբեք չենթարկվել Ադրբեջանին, այլ միանալ Հայաստանի Հանրապետությանը⁷⁸:

Արցախահայության անկոտորում կամքը ճգմելու և գավառը վերջնականապես բռնազավթելու Ադրբեջանի ջանքերն էլ ավելի սաստկացան: Դրան հակառակ Արցախի տեղական իշխանությունները փորձում էին ստանալ խնդիրը խաղաղ լուծելու Ադրբեջանի համաձայնությունը մինչև Փարիզի խորհրդածողովի կողմից հիմնահարցի լուծումը: Հարցի այդօրինակ լուծման համար Ղարաբաղի Հայոց Ազգային խորհուրդը հրավիրեց արցախահայության 7-րդ համագումարը: Սուլթանովը Ազգային խորհրդից պահանջում է համագումարը հրավիրել Շուշի քաղաքում: Շուշին լավ ամրացված էր, այստեղ տեղակայված էին ադրբեջանական զորամասեր և քրդական զինված խմբեր: Օգտագործելով այդ հնարավորությունները՝ Սուլթանովը կարող էր խիստ վերահսկողություն սահմանել համագումարի աշխատանքների վրա և պատգամավորների նկատմամբ ֆիզիկական ու բարոյական

⁷⁵ Տե՛ս «Պահակ», 26. VIII. 1919, ՀԱԱ, ֆ. 4033, ց. 5, գ. 461, թ. 168–171:

⁷⁶ Տե՛ս «Պահակ», 26. VIII. 1919:

⁷⁷ Տե՛ս ՀԱԱ, ֆ. 4033, ց. 5, գ. 461, թ. 168–170:

⁷⁸ Տե՛ս ՀԱԱ, ֆ. 200, ց. 1, գ. 309, թ. 210–214, 233–234, □Արձագանք□, 24. VI. 1919:

ճնշումներ գործադրելով՝ կայացնել Ադրբեջանի համար առավել ընդունելի որոշումներ: Ի հակադրություն Սուլթանովի՝ համագումարը գումարվեց Շոշ գյուղում օգոստոսի 12-ին⁷⁹: Սուլթանովը օգոստոսի 14-ին կարգադրեց հրանոթներ տեղադրել Շոշ գյուղի ու Շուշի քաղաքի հայկական թաղամասերի ուղղությամբ և փակել սովեց Եվլախ-Շուշի ճանապարհը: Նույն օրը նա վերջնագիր ներկայացրեց համագումարին և պահանջեց 48 ժամվա ընթացքում ընդունել Ադրբեջանի իշխանությունը⁸⁰: Պատգամավորների մի մասը պնդում էր, որ պետք է ընդունել Սուլթանովի մարտահրավերը և համագումարի անունից արցախահայությանը նոր պայքարի կոչել: Սակայն Վահան եպիսկոպոսին և նախագահության անդամներին հաջողվում է համոզել պատգամավորների ճնշող մեծամասնությանը, որ Ադրբեջանի դեմ պայքարելու համար ներքին ու արտաքին պայմանները նպաստավոր չեն: Օգոստոսի 15-ին պատգամավորները որոշեցին ժամանակավորապես ընդունել վերջնագիրը: Համագումարի կողմից ընտրված պատվիրակությունը մեկնեց Շուշի և Սուլթանովի հետ ստորագրեց 26 կետից բաղկացած մի համաձայնագիր, ըստ որի Ղարաբաղի լեռնային մասը՝ Շուշիի, Ջիվանշիրի, Ջեբրայիլի գավառները, ժամանակավորապես մտնում են Ադրբեջանի Հանրապետության սահմանների մեջ⁸¹:

Ադրբեջանական կողմը շարունակաբար խախտում էր համաձայնագրի պայմանները: Ավելին, 1920 թ. փետրվարի 19-ին Սուլթանովն իր կառավարության անունից Ղարաբաղի Հայոց Ազգային խորհրդին հայտարարեց, որ այլևս խաղաղության վեհաժողով գոյություն չունի, որ Ղարաբաղի հարցը պետք է լուծվի սեփական նախաձեռնությամբ, և Ազգային խորհրդից պահանջեց առաջիկա համագումարում վերջնականապես վճռել Ադրբեջանին ենթարկվելու հարցը⁸²: Ի պատասխան Սուլթանովի վերջնագրի՝ Ղարաբաղի Հայոց Ազգային խորհուրդը 1920 թ. փետրվարի 28-ին Շոշ գյուղում հրավիրում է 8-րդ համագումարը⁸³: Համագումարը Շուշիում գումարելու Սուլթանովի ցանկությունը, կարելի է ասել, կատարվեց մասամբ: Բանն այն է, որ Ազգային խորհուրդը նախապես տեղեկացնում է համագումարի պատգամավորներին քաղաք չգալ, այլ հավաքվել Շոշ գյուղում: Դժբախտաբար, Ազգային խորհրդին չի հաջողվում այդ մասին տեղյակ պահել բոլոր պատգամավորներին: Դա էր պատճառը, որ համագումարին հրավիրված 127 պատգամավորներից 50-ը հավաքվեցին Շուշիում, իսկ 77-ը՝ Շոշ գյուղում⁸⁴: Շոշ գյուղի համագումարը վերստին արտահայտելով հայության անբեկանելի կամքը՝ իր ընդունած բանաձևով մերժում է Խոսրով բեկ Սուլթանովի պահանջը և կրկին բարձրաձայնում է Հայաստանի Հանրապետության հետ վերամիավորվելու մասին⁸⁵: Ինչ վերաբերում է Շուշիի համագումարին,

⁷⁹ Տե՛ս նաև շ. 57, գ. 5, գ. 202, թ. 7-8:

⁸⁰ Տե՛ս նույն տեղում:

⁸¹ Տե՛ս նաև շ. 199, գ. 1, գ. 9, թ. 67-68:

⁸² Տե՛ս «Հատուց», 19. III. 1920, 4. IV. 1920:

⁸³ Տե՛ս նաև շ. 4047, գ. 1, գ. 155, թ. 1:

⁸⁴ Տե՛ս նաև շ. 278, գ. 1, գ. 21, թ. 34-35:

⁸⁵ Տե՛ս նաև շ. 200, գ. 1, գ. 563, թ. 29-35:

ապա այն Սուլթանովի ճնշման տակ ընդունում է Ադրբեջանի շահերից բխող որոշումներ:

Ադրբեջանը և նրա թիկունքին կանգնած Թուրքիան լիովին հասկացան, որ Արցախի հարցը լուծելու ճանապարհը մեկն է՝ արցախահայության բնաջնջումը: Այդ նպատակի համար Ադրբեջանը մեծաթիվ զինուժ կենտրոնացրեց Ղարաբաղի գավառում: Ստույգ տվյալներով 1920 թ. գարնանը Ղարաբաղում կենտրոնացված էր ավելի քան 10 հազար զինվոր: Շտապ կազմակերպվեց քրդական մի դիվիզիա: Շուշի ժամանեց Նուրի փաշան՝ 10 թուրք սպաների ուղեկցությամբ⁸⁶: Մարտի 11-ին և 12-ին Բաքվից Ջեբրայիլի վրայով Ղարաբաղ և Ջանգեզուր ուղարկվեց 90 վազոն՝ բեռնված զենքով ու զինամթերքով⁸⁷:

Մարտի 20-ին Սուլթանովի կարգադրությամբ թուրք-թաթարական մեծաթիվ զորքերը սկսեցին բռնությամբ զինաթափել բնակչությանը և կոտորել նրանց: Թաթարները պատրաստվում էին մեծ հանդիսավորությամբ նշել Նովրուզ բայրամը՝ ամանորը: Տոնակատարությանը մասնակցելու անվան տակ (հրականում հայերին կոտորելու) Խանքենդից գործը, հրամանատարական կազմով, բերվեց Շուշի գորահանդեսի: Շուշի եկան նաև Ադդամի թուրք բեկերը, ինչպես նաև Ղարաբաղի տարբեր շրջաններից հարյուրավոր մուսուլմաններ: Շուշիի հայությանը ևս կարգադրված էր մինչև մարտի 22-ը զենքերը հանձնել: Ժամկետը լրանալուց հետո՝ նույն օրը՝ առավոտյան, Սուլթանովի հրամանով զինվորական պահակախմբերը սկսում են շրջել քաղաքի հայկական թաղամասում և խուզարկել բնակարանները:

Լեոնային Ղարաբաղի և Ջանգեզուրի դեմ Ադրբեջանի լայնածավալ հարձակումը սկսվեց մարտի 22-ին: Մուսավաթական բանակի հարվածային ուժերը թուրք սպաների հրամանատարությամբ կենտրոնացել էին Ադդամ-Ասկերան-Խանքենդ-Շուշի խճուղու, իսկ արևմտյան կողմից՝ Քիրս-Տումի-Խծաբերդ ուղղություններում⁸⁸: Հայկական զինված ջոկատները հարձակման անցան ռազմավարական նշանակություն ունեցող Ասկերանի, Շուշիի և Խանքենդի վրա: Մարտի 22-ին Խանքենդի ուղղությամբ գործող հայկական ուժերը, թշնամուն մեծ կորուստներ պատճառելով, գրավում են Խոջալուն և Խանքենդը: Մարտի 23-ին Արցախի քաջարի մարտիկները գրավեցին Ասկերանի բերդը և հարվածելով հակառակորդին՝ քջեցին մինչև Ղարաղաջ⁸⁹:

Արցախում տեղի ունեցած ողբերգական իրադարձությունների կիզակետը դարձավ Շուշիի հայ ազգաբնակչության սպանողը: Չորքը և մուսուլման բնակչությունը մի ամբողջ օր՝ մարտի 23-ին, արյան խրախճանք են կատարում քաղաքում: Հայ բնակչության մեծ մասը սրի է քաշվում, սպանվում են հազարավոր տղամարդիկ, կանայք, ծերեր և երեխաներ: Ոչ ստույգ տվյալներով Շուշիում զոհվածների թիվը հասնում էր մոտ 8 հազարի: Մահից փրկված Շուշիի հայության բեկորները, թվով 5–6 հազար

⁸⁶ Տե՛ս «Տողովուրդ», 26. III. 1920:

⁸⁷ Տե՛ս Нагорный Карабах в 1918–1923 гг., с. 431.

⁸⁸ Տե՛ս ՀԱԱ, ֆ. 314, ց. 1, գ. 34, թ. 220:

⁸⁹ Տե՛ս նույն տեղում, թ. 222–223:

մարդ, մագապուրծ փախսան Վարանդ և Դիզակ⁹⁰: Ըստ Ղարաբաղի Հայոց Ազգային խորհրդի կազմած վիճակագրության՝ կործանված գյուղերից ու շեներից մոտ 20 հազար չափահաս և ավելի քան 4 հազար անչափահաս մարդ ապաստան գտան Վարանդայի, Դիզակի և մասամբ Ջանգեզուրի գյուղերում⁹¹:

Բազմակողմանի նախապատրաստությունից հետո՝ մարտի վերջին, թուրքերը միաժամանակ երեք՝ Ասկերան–Շուշի խճուղու, Աղդամ–Վանք և Կարաչինար–Էրքեջ ուղղություններով սկսեցին հակահարձակումը: Թուրքերը կատաղի մարտեր ծավալեցին Ասկերանի ուղղությամբ: Բազմաթիվ անհաջող հարձակումներից հետո թշնամին ապրիլի 3-ին գրավեց Ասկերանը⁹²:

Ապրիլի 6-ին Շուշի քաղաքից սկսվեց Շոշ և Քարինտակ գյուղերի գնդակոծումը: Ապրիլի 7-ին թուրքերը մեծ ուժերով գրավեցին Խանքենդը և ուղղություն վերցրին դեպի հարավ՝ Կարյազինո: Ապրիլի 12-ին մուսավաթական բանակին հաջողվեց գրավել հայկական մի շարք գյուղեր և ընդհուպ մոտենալ Քեշիշքենդ ու Սդնախ գյուղերին: Այստեղ նրանց առաջխաղացումը կասեցվեց⁹³:

Դիզակի ռազմաճակատում գործող հայկական ուժերը պետք է լուծեին կարևոր խնդիր՝ առաջանալ դեպի Ջանգեզուր և գրավել մուսուլմանների ռազմավարական հենակետերը՝ հաղորդակցությունը Ջանգեզուրի հետ վերականգնելու համար: Հակառակորդին մի շարք մարտերում ծանր պարտության մատնելուց հետո՝ հայկական ուժերը մտնում են Ղարաղջաղ գյուղը և ճանապարհ բացում դեպի Ջանգեզուր:

Արցախահայերի համար վերջապես եկավ երկար սպասված ցանկալի պահը: Հայաստանի Հանրապետության կառավարության կարգադրությամբ 1920 թ. ապրիլի 14-ին Ջանգեզուրի կողմից Արցախի Վարանդա գավառ մտան հայկական զորամասերը Դրոյի հրամանատարությամբ և մի քանի օրվա ընթացքում Ղարաբաղը մաքրեցին թուրք-թաթարական զորքերից: Սուլթանովն իր զինված կազմավորումներով պատասպարվեց շրջափակման մեջ գտնվող Շուշիում: Ի դեպ, Շուշին և Խանքենդը շրջափակվել էին այնպես, որ ոչ մի կապ չունեին դրսի աշխարհի հետ: Շուշիում պաշարված թուրքերը Աղդամի հետ իրենց կապը պահպանում էին գիշերները գույնզ-գույն լապտերների ու զանազան ազդանշանների միջոցով⁹⁴: Դրոյի անմիջական նախաձեռնությամբ ստեղծվեց Արցախի ժամանակավոր կառավարություն՝ «Վարիչների խորհուրդ» անունով: Ստեղծվեց բանակի ընդհանուր հրամանատարություն՝ Դրոյի գլխավորությամբ: Ղարաբաղի և Ջանգեզուրի միջև սկսվեց ազատ հաղորդակցություն: Կազմակերպվեց սայլերի գումակ, որի միջոցով Ջանգեզուրից և այլ վայրերից շարունակաբար գենք, զինամթերք ու պարեն էր հասցվում Ղարաբաղ: Բոլոր ճակատներն ու ռազմավարական նշանակության բնակավայրերը միացվեցին

⁹⁰ Տե՛ս նաև շ. 200, գ. 1, գ. 427, մաս 1, թ. 179, մաս 2, թ. 245, Ֆ. 4033, գ. 5, գ. 461, թ. 145:

⁹¹ Տե՛ս նաև շ. 200, գ. 1, գ. 563, թ. 69, «Հառաջ», 12. V. 1920:

⁹² Տե՛ս նաև նույն տեղում, թ. 234–235, Нагорный Карабах в 1918–1923 гг., с. 435.

⁹³ Տե՛ս նաև «Հառաջ», 12. IX. 1920:

⁹⁴ Տե՛ս նաև շ. 314, գ. 1, գ. 34, թ. 270–274:

հեռախոսային գծերով⁹⁵: Դրոյի առաջնահերթ խնդիրն էր ապահովել Արցախի անվտանգությունը և լուծել գավառը Հայաստանին վերամիավորելու հարցը: Նրա մասնակցությամբ ապրիլի 25-ին Թաղավարդ գյուղում գումարվեց արցախահայության 9-րդ համագումարը, որը մեկ անգամ ևս արձանագրեց. «Հռչակել Լեռնային Ղարաբաղի միացումը Հայաստանի Հանրապետությանը՝ որպես նրա անբաժան մաս»⁹⁶:

Քաղաքական նոր զարգացումները, սակայն, փոխեցին իրավիճակը: Ապրիլի 28-ին Ադրբեջանում հաստատվեցին խորհրդային կարգեր: Բաքվի բոլշևիկյան հեղաշրջումից հետո ռուսական կարմիր բանակի զորամասերը մոտեցան Արցախի սահմաններին: Ադրբեջանի բոլշևիկ կառավարողները ապրիլի 30-ին և մայիսի 8-ին Հայաստանի կառավարությանը ներկայացրին վերջնագիր՝ պահանջելով հայկական զորամասերը դուրս բերել Լեռնային Ղարաբաղի սահմաններից: Մինչ Հայաստանի կառավարությունը ուղիներ էր փնտրում վիճահարույց հարցերի խաղաղ կարգավորման համար, Շուշիի և Զանգեզուրի շրջաններում հայ-թաթարական կոտորածները կանխելու պատրվակի տակ մայիսի 11-ին, Կովկասյան ճակատի հրամանատարության հրամանով, 11-րդ կարմիր բանակի ձախաթևյան զորամասերը շարժվեցին Նախիջևանի, Օրդուբաղի և Շուշիի շրջանները⁹⁷: Մայիսի 12-ին Շուշի մտավ 11-րդ կարմիր բանակի 32-րդ դիվիզիայի 281-րդ գունդը՝ հրամանատար Աբուզարովի և զինվոր Գայդալովի ղեկավարությամբ: Ղարաբաղ եկան մի շարք բարձրաստիճան սպաներ: Կարմիր բանակի զորամասերը հսկում էին Արցախի ռազմավարական կարևորագույն կետերի վրա, իսկ Ադրբեջանի կառավարությունն էլ վերջնագրային լեզվով պահանջում էր երեք օրվա ընթացքում ենթարկվել իրեն: Արցախահայությունը զայրացած և վրդովված էր Սուլթանովի՝ Ղարաբաղը խորհրդայնացնելուն ուղղված ջանքերից: Մայիսի 6-7-ին Լեռնային Ղարաբաղի գյուղացիության պաշտպանության կոմիտեն Վ. Լենինին հասցեագրված (պատճեն Ն. Նարիմանովին) հեռագրում հայտնում է, որ չի վստահում Ղարաբաղի հեղկոմի կոչին. «... որովհետև Շուշիի հեղկոմից ծանուցագիրը նա ստացել է այն պահին, երբ գնդացիների ու հրանոթների որոտը շարունակում է ոչնչացնել խաղաղ հայ բնակչությանը...»⁹⁸:

Մայիսի 18-ին Կովկասյան ճակատի Ռազմահեղափոխական խորհրդի անդամ Գ. Օրջոնիկիձեի ներկայացուցիչներ Ս. Տեր-Գաբրիելյանն ու Լևանդովսկին հանդիպեցին Դրոյին և խորհրդային իշխանության անունից պահանջեցին հայկական զորամասերը դուրս բերել Լեռնային Ղարաբաղից⁹⁹: Հանդիպման արդյունքների մասին Դրոն հեռագրեց Հայաստանի կառավարությանը: Դրանում ասված էր. «Ռուսական բանակների մոտենալը Ջիվանշիրին, Թարթառ գյուղի գրավումը և հարյուրավոր կարմիրների մուտք գործելը Մերկուրդիպոր և Քասապետ գյուղերը,

⁹⁵ Տե՛ս նույն տեղում, թ. 270–273:

⁹⁶ Տե՛ս ՀԱԱ, ֆ. 4033, ց. 5, գ. 461, թ. 144:

⁹⁷ Տե՛ս Нагорный Карабах в 1918–1923 гг., с. 464–465.

⁹⁸ Տե՛ս նույն տեղում, էջ 457:

⁹⁹ Տե՛ս ՀԱԱ, ֆ. 200, ց. 1, գ. 427, մաս 2, թ. 336:

վերջնականապես բարոյալքեցին մեր գյուղացիությանը: Ջիվանշիրում հռչակվեցին խորհրդային կարգեր: Խաչենը վարակվել է բոլշևիզմով... Անհնարին է, որ հայ գյուղացին դիմադրություն ցույց տա ռուս բոլշևիկներին»¹⁰⁰:

Մայիսի 22-ին տեղի ունեցավ Ղարաբաղի ժամանակավոր կառավարության վերջին նիստը: Կառավարությունը համոզմունք հայտնեց, որ երկրամասում ստեղծված իրավիճակում դրությունը կարող են փրկել տեղական բոլշևիկները՝ իշխանությունն իրենց ձեռքը վերցնելով և Ղարաբաղը հայտարարելով Խորհրդային Ռուսաստանի մաս, այլ ոչ թե Ադրբեջանի¹⁰¹: Մայիսի 23-ին Հայաստանի կառավարությունը Արցախից տեղեկություն ստացավ այն մասին, որ Խաչենը, Ջիվանշիրը և Գյուլիստանը, ուր մտել է ռուսական կարմիր բանակը, իրենց հռչակել են խորհրդային¹⁰²: Համաձայն նույն լուրերի, Վարանդան և Դիզակը նույնպես տրամադրված չէին դիմադրություն ցույց տալու ռուսական զորքերին¹⁰³:

Այսպիսով, քաղաքական հանգամանքները դասավորվեցին այնպես, որ Դրոն մայիսի 26-ին իշխանությունը հանձնեց բժիշկ, բոլշևիկ Մաքո Համբարձումյանին և հաջորդ օրը՝ մայիսի 27-ին, իր գործառնով հեռացավ Արցախից և վերադարձավ Գորիս՝ ամբողջ զինանոցը և պարենի պահեստները թողնելով դարաբաղցիներին¹⁰⁴:

Մայիսի 28-ին Թաղավարդ գյուղում տեղի ունեցավ արցախահայության 10-րդ համագումարը, որը Լեռնային Ղարաբաղը հռչակեց խորհրդային և ստեղծեց հեղկոմ՝ Ս. Համբարձումյանի նախագահությամբ: Միաժամանակ ստեղծվեց նաև Դաշտային Ղարաբաղի հեղկոմ՝ Բ. Վելիբեկովի նախագահությամբ: Հունիսի 16-ին Լեռնային Ղարաբաղի և Դաշտային Ղարաբաղի հեղկոմները միավորվեցին, կենտրոնը դարձավ Շուշի քաղաքը: Միացյալ հեղկոմի նախագահ նշանակվեց Բ. Վելիբեկովը, իսկ Ս. Համբարձումյանը՝ կուսակցության Շուշիի գավառային կոմիտեի առաջին քարտուղար:

Այսպիսով, ռուսական կարմիր բանակի օգնությամբ և բոլշևիկյան Ռուսաստանի ղեկավար գործիչների հովանավորությամբ Ադրբեջանն իր ներկայացուցիչներին դրեց Ղարաբաղի կուսակցական և խորհրդային ղեկավար պաշտոններում ու սկսեց աստիճանաբար նվաճել Ղարաբաղը: Այլ կերպ ասած՝ ինչին չկարողացավ հասնել մուսավաթական Ադրբեջանը թուրքերի և բրիտանացիների օգնությամբ, Արցախին անհամեմատ հեշտությամբ տիրացավ «կարմիր» Ադրբեջանը խորհրդային կարգերի քողի տակ:

¹⁰⁰ Տե՛ս նույն տեղում, գ. 563, թ. 193:

¹⁰¹ Տե՛ս նաև Հ ա Ր Ո Ւ Թ Յ Ո Ւ և յ ա ն. նշվ. աշխ., էջ 243:

¹⁰² Տե՛ս ՀԱԱ, ֆ. 200, ց. 1, գ. 427, մաս 2, թ. 336:

¹⁰³ Տե՛ս նույն տեղում, գ. 563, թ. 198:

¹⁰⁴ Տե՛ս նույն տեղում, գ. 427, մաս 2, թ. 336:

ШУШИ В АРЦАХСКОЙ БОРЬБЕ ЗА ВЫЖИВАНИЕ
(1918–1920 гг.)

ГАМЛЕТ АРУТЮНЯН

Р е з ю м е

После приобретения независимости мусаватистское правительство Азербайджана поставило цель оккупировать неотделимую часть исторической Армении–Нагорный Карабах, Зангезур и Нахичеван. Арцахские армяне встали на борьбу против злостного врага ради свободы и независимости своей родины. Оплотом этой борьбы стал город-крепость Шуши. Крупномасштабные планы Азербайджана открыто поощряла и способствовала их осуществлению Турция, через некоторое время – британские оккупанты и Советская Россия. Однако героическая борьба за выживание арцахских армян с целью воссоединения с Арменией не получила логической развязки вследствие большевистского переворота в Баку. 11 мая 1920 г. воинские части 11-й Красной армии вошли в Нагорный Карабах. В Карабахе установилась советская власть.

SHUSHI IN THE STRUGGLE FOR EXISTENCE OF ARSAKH
(1918–1920)

HAMLET HARUTYUNYAN

S u m m a r y

After the acquisition of independence, the Musavat government of Azerbaijan intended to conquer the indivisible part of historical Armenia – Nagorno-Karabakh, Zangezur and Nakhijevan. The Armenians of Artsakh rebelled against the mean enemy and fought for the independence of their native country. The fulcrum of that struggle was the fortress of Shushi. Expansive plans of Azerbaijan were obviously encouraged and contributed to the implementation by Turkey, later by the British conquerors and also by the Soviet Russia. However, the heroic struggle for uniting with Armenia did not have a logical solution because of the Bolshevik coup in Baku. On May 11, 1920 the military units of the 11th Red Army penetrated to Nagorno-Karabakh. Soviet power was established in Karabakh.